

臺官也傳于沈彥慶等曰正言所啓與予意一也勿辭沈彥慶等又啓  
曰許沆之言雖曰泛論而語逼如此不可在職傳曰予意及正言之言  
皆已言之矣勿辭○日暈兩珥冠○癸未以李龜齡為忠清道觀察使  
特命也尹衡為禮曹參議蔡世傑為兵曹參議李耘為工曹參議許寬為  
承政院都承旨○甲申命官分運試武才以國恤不得親行恐武事廢  
弛也○傳曰餽粟稱事所以勸百工故匠人給料事在法典頃者還給  
減省料食為是故也且各司以時考匠人才不才為師者不能勸教為  
弟子者不能勤業則皆可治罪非徒匠人之事凡各司官貪能經術者  
用之於成均館知營繕者用之於繕工監知工匠者用之於工曹尚衣  
院知圖畫者用之於圖畫署知音樂者用之於掌樂院知軍器火炮者  
用之於軍器寺知天文地理者用之於觀象監知馬病者用之於司僕  
寺隨其所能而用之可也尹倬自成均館典籍至為同知事能為師表  
之任故也前者金靈兩自繕工監郎官至為判事以至於堂上官能知  
工匠之事故也大抵用人如良匠之用木隨其短長而用之其以此意  
奉傳旨下吏兵曹○御夕講○日暈○乙酉夜南方乾方艮方有氣如  
火○丙戌夜巽方南方乾方艮方有氣如火○丁亥 御夕講檢討官